

## Maxsus qism

### VI bo'lim.

Davlat byudjetini va davlat maqsadli jamg'armalari byudjetlarini tuzish, ko'rib chiqish, qabul qilish hamda tasdiqlash

### 16-bob. Davlat byudjeti va davlat maqsadli jamg'armalari byudjetlarining loyihasini tuzish tartibi

#### 83-modda. Davlat byudjeti to'g'risidagi qonun loyihasini ishlab chiqish

Navbatdagi yil uchun Davlat byudjeti to'g'risidagi qonun loyihasi hamda kelgusi ikki yilga byudjet mo'ljallari o'rta muddatli davr uchun ijtimoiy-iqtisodiy rivojlantirishning ustuvor yo'nalishlari va makroiqtisodiy ko'rsatkichlar prognozi asosida ishlab chiqiladi.

Davlat byudjeti to'g'risidagi qonun loyihasini ishlab chiqish:

byudjet so'rovini tuzish tartibini yuborishni;

byudjet so'rovlarini hamda asosiy makroiqtisodiy ko'rsatkichlar prognozlarini tayyorlash va taqdim etishni;

byudjet so'rovlarini ko'rib chiqish va jamlashni;

byudjetnomani ishlab chiqishni nazarda tutadi.

*(83-modda O'zbekiston Respublikasining 2019 yil 9 dekabrda O'RQ-590-sonli Qonuni tahririda — Qonun hujjatlari ma'lumotlari milliy bazasi, 10.12.2019 y., 03/19/590/4129-son)*

#### 84-modda. Davlat byudjeti va davlat maqsadli jamg'armalari byudjetlari loyihalarini tuzish uchun mas'ul organlar

Davlat byudjeti loyihasini tuzish uchun mas'ul organlar quyidagilardir:

O'zbekiston Respublikasi Moliya vazirligi;

vazirliklar, davlat qo'mitalari va idoralar, mahalliy davlat hokimiyati organlari, byudjetlar loyihalarini tuzish, O'zbekiston Respublikasi Moliya vazirligi tomonidan so'ralgan axborot va ma'lumotlarni taqdim etishga taalluqli qismi bo'yicha.

Davlat maqsadli jamg'armalarini taqsimlovchi organlar davlat maqsadli jamg'armalari byudjetlarining loyihalarini tuzish uchun mas'ul organlardir.

*Qarang: Mazkur Kodeksning 25 — 29-moddalari.*

## 85-modda. Byudjet so'rovi

Byudjet so'rovi:

byudjet tashkilotining, byudjet mablag'lari oluvchining va byudjet mablag'larini taqsimlovchining byudjet tizimi byudjetlari mablag'laridan foydalanish bilan bog'liq faoliyatining miqdor va sifat ko'rsatkichlarini o'z ichiga oluvchi, o'tgan yilda erishilgan natijalar va joriy yilda kutilayotgan natijalar to'g'risidagi tahliliy hisobotni;

xarajat majburiyatlarining ularni kiritish (ijro etish) uchun asos bo'ladigan hamda moliyalashtirish manbalari va amal qilish muddatlarini belgilaydigan normativ-huquqiy hujjatlar, shartnomalar va (yoki) ularning alohida qoidalari ko'rsatilgan reyestrini;

byudjet mablag'larini taqsimlovchining rivojlantirish dasturini;

byudjet mablag'larini taqsimlovchining rivojlantirish dasturi bilan uzviy bog'liq holda tuzilgan kelgusi davr uchun byudjet buyurtmasini o'z ichiga oladi.

Qoraqalpog'iston Respublikasi Vazirlar Kengashi, viloyatlar va Toshkent shahar hokimliklari, davlat maqsadli jamg'armalarini taqsimlovchi organlar byudjet so'rovi bilan bir vaqtda tegishli byudjetlar va davlat maqsadli jamg'armalari daromadlarining kelgusi davr uchun prognozlarini taqdim etadi.

Byudjet so'rovini tuzish tartibi:

Davlat byudjeti bo'yicha — O'zbekiston Respublikasi Moliya vazirligi tomonidan;

davlat maqsadli jamg'armalari bo'yicha — ularning taqsimlovchi organlari tomonidan belgilanadi.

## 86-modda. O'tgan yilda erishilgan natijalar va joriy yilda kutilayotgan natijalar to'g'risidagi tahliliy hisobot

O'tgan yilda erishilgan natijalar va joriy yilda kutilayotgan natijalar to'g'risidagi tahliliy hisobot byudjet tashkiloti, byudjet mablag'lari oluvchi va byudjet mablag'larini taqsimlovchi tomonidan tuziladi hamda byudjet tashkiloti, byudjet mablag'lari oluvchi va byudjet mablag'larini taqsimlovchining faoliyatini baholash, bundan buyon uni byudjet tizimi byudjetlarining mablag'lari hisobidan moliyalashtirishning maqsadga muvofiqligi haqida takliflar tayyorlash uchun foydalaniladi.

O'tgan yilda erishilgan natijalar va joriy yilda kutilayotgan natijalar to'g'risidagi tahliliy hisobot byudjet tashkiloti, byudjet mablag'lari oluvchi va byudjet mablag'larini taqsimlovchining har bir faoliyat turi bo'yicha o'tgan yilda erishilgan va joriy yilda kutilayotgan natijalarining asosiy miqdor va sifat ko'rsatkichlari haqidagi axborotni o'z ichiga oladi.

O'tgan yilda erishilgan natijalar va joriy yilda kutilayotgan natijalar to'g'risidagi tahliliy hisobot qisqa va aniq shaklda bayon etilishi hamda u mazkur faoliyat sohasida kasbiy bilimlarga ega bo'lmagan shaxslarning uni tushunishini qiyinlashtiradigan maxsus atamalarni o'z ichiga olmasligi kerak.

## 87-modda. Xarajat majburiyatlarining reyestri

Xarajat majburiyatlarining reyestri byudjet tashkiloti, byudjet mablag'lari oluvchi va byudjet mablag'larini taqsimlovchi tomonidan amalga oshiriladigan faoliyat turlari va tadbirlarning byudjet tizimi byudjetlarining mablag'lari hisobidan uni moliyalashtirish uchun asos bo'lgan tegishli qonun hujjati ko'rsatilgan ro'yxatidir.

Xarajat majburiyatlarining reyestri byudjet tashkiloti, byudjet mablag‘lari oluvchi va byudjet mablag‘larini taqsimlovchi tomonidan o‘zlari amalga oshirayotgan xarajatlarni asoslanganligi nuqtai nazaridan tahlil qilish uchun byudjet tasnifiga muvofiq tuziladi.

*Qarang: Mazkur Kodeks 85-moddasi birinchi qismining ikkinchi xatboshisi.*

88-modda. Byudjet mablag‘larini taqsimlovchining rivojlantirish dasturi

Byudjet mablag‘larini taqsimlovchining rivojlantirish dasturi byudjet mablag‘larini taqsimlovchi tomonidan uch yildan kam bo‘lmagan davr uchun tuziladi va quyidagilarni o‘z ichiga oladi:

byudjet mablag‘larini taqsimlovchi faoliyatining barcha sohalari bo‘yicha rivojlanishning asosiy yo‘nalishlari, maqsadlari va vazifalarini;

maqsadlarga erishish va vazifalarni bajarishga qaratilgan o‘zaro bog‘liq huquqiy, iqtisodiy, ijtimoiy, tashkiliy va texnik tadbirlar majmuini;

maqsadlarga erishish va vazifalarni bajarishni ta‘minlaydigan, muddatlari va turlari bo‘yicha kelishilgan kutilayotgan natijalar ko‘rsatkichlari tizimini.

Byudjet mablag‘larini taqsimlovchining rivojlantirish dasturi O‘zbekiston Respublikasining qonunlari, O‘zbekiston Respublikasi Prezidenti, O‘zbekiston Respublikasi Oliy Majlisi palatalari va O‘zbekiston Respublikasi Vazirlar Mahkamasi qarorlari bilan belgilangan maqsad va vazifalarga asoslanadi.

Byudjet mablag‘larini taqsimlovchining rivojlantirish dasturi byudjet mablag‘larini taqsimlovchi tomonidan yuqori turuvchi organ bilan kelishilgan holda tasdiqlanadi.

## 89-modda. Byudjet buyurtmasi

Byudjet buyurtmasi byudjet tashkiloti, byudjet mablagʻlari oluvchi va byudjet mablagʻlarini taqsimlovchi tomonidan tuziladi.

Byudjet tashkiloti yoxud byudjet mablagʻlari oluvchi tomonidan tuzilgan byudjet buyurtmasi tegishli byudjet mablagʻlarini taqsimlovchiga byudjet mablagʻlarini taqsimlovchi tomonidan belgilangan muddatda, biroq tegishli moliya organi va davlat maqsadli jamgʻarmasini taqsimlovchi organga byudjet soʻrovini taqdim etish muddatidan kechiktirmasdan taqdim etiladi.

Byudjet buyurtmasida oʻtgan va joriy yillar uchun hamda kelgusi uch yil uchun byudjet tizimi byudjetlarining mablagʻlari hisobidan amalga oshiriladigan xarajatlar byudjet tasnifiga muvofiq aks ettiriladi.

Byudjet mablagʻlarini taqsimlovchi oʻz tasarrufidagi byudjet tashkilotlari va byudjet mablagʻlari oluvchilarning byudjet buyurtmalari asosida jamlanma byudjet buyurtmasini tuzadi.

Byudjet mablagʻlarini taqsimlovchining jamlanma byudjet buyurtmasi byudjet mablagʻlarini taqsimlovchining rivojlantirish dasturi bilan uzviy bogʻliq holda tuziladi.

Byudjet buyurtmasida xarajatlar hajmlarini oʻtgan yillarga nisbatan koʻpaytirishga faqat asoslovchi qonun hujjati boʻlgan taqdirda va mazkur koʻpaytirish byudjet mablagʻlarini taqsimlovchining rivojlantirish dasturida nazarda tutilgan hollarda yoʻl qoʻyiladi.

*Qarang: Mazkur Kodeksning 32-moddasi birinchi qismining ikkinchi xatboshisi, 85-moddasi birinchi qismining beshinchi xatboshisi.*

## 90-modda. Byudjet soʻrovini tuzish tartibini yuborish

Oʻzbekiston Respublikasi Moliya vazirligi har yili 15 aprelga qadar kelgusi davr uchun byudjet soʻrovini tuzish tartibini:



O‘zbekiston Respublikasining respublika byudjeti loyihasini tayyorlash uchun — byudjet mablag‘larini taqsimlovchilarga;

Qoraqalpog‘iston Respublikasi byudjeti, viloyatlar va Toshkent shahar mahalliy byudjetlari loyihalarini tayyorlash uchun — Qoraqalpog‘iston Respublikasi Vazirlar Kengashiga, viloyatlar va Toshkent shahar hokimlariga;

*(90-moddaning birinchi qismi to‘rtinchi xatboshisi O‘zbekiston Respublikasining 2015 yil 29 dekabrda O‘RQ-396-sonli Qonunga asosan chiqarilgan — O‘R QHT, 2015 y., 52-son, 645-modda)*

O‘zbekiston Respublikasi Moliya vazirligi ushbu moddaning **birinchi qismida** belgilangan muddatlarda O‘zbekiston Respublikasi Davlat soliq qo‘mitasi, O‘zbekiston Respublikasi Davlat bojxona qo‘mitasi va boshqa vazirliklar, davlat qo‘mitalari hamda idoralardan Davlat byudjeti loyihasining daromad qismi bo‘yicha takliflar so‘raydi.

Byudjet mablag‘larini taqsimlovchilar, Qoraqalpog‘iston Respublikasi Vazirlar Kengashi, viloyatlar va Toshkent shahar hokimlari, davlat maqsadli jamg‘armalarini taqsimlovchi organlar kelgusi davr uchun byudjet so‘rovini tuzish tartibini olgandan so‘ng uch ish kuni ichida tegishli byudjet so‘rovlarini tuzish to‘g‘risida va ularni tayyorlash muddatlarini belgilash haqida qarorlar qabul qiladi.

Qoraqalpog‘iston Respublikasi Moliya vazirligi, viloyatlar va Toshkent shahar hokimliklarining moliya boshqarmalari ushbu moddaning **uchinchi qismida** ko‘rsatilgan qarorlar qabul qilinganidan so‘ng uch ish kuni ichida kelgusi davr uchun byudjet so‘rovini tuzish tartibini:

tegishli byudjetlar loyihalarini tayyorlash uchun — tuman va shahar hokimlariga;

byudjet so‘rovlarini tuzish uchun — Qoraqalpog‘iston Respublikasining respublika byudjetidan, viloyatlarning viloyat byudjetlaridan va Toshkent shahrining shahar byudjetidan

moliyalashtiriladigan byudjet tashkilotlari hamda byudjet mablagʻlari oluvchilarga yuboradi.

Tuman va shahar hokimlari kelgusi davr uchun byudjet soʻrovini tuzish tartibini olgandan soʻng uch ish kuni ichida tegishli byudjetlar loyihalarini tuzish toʻgʻrisida va ularni tayyorlash muddatlarini belgilash haqida qarorlar qabul qiladi.

Tumanlar va shaharlar hokimliklarining moliya boʻlimlari ushbu moddaning **bashinchi qismida** koʻrsatilgan qarorlar qabul qilinganidan soʻng uch ish kuni ichida kelgusi davr uchun byudjet soʻrovini tuzish tartibini tumanlar va shaharlar byudjetidan moliyalashtiriladigan byudjet tashkilotlariga va byudjet mablagʻlari oluvchilarga byudjet soʻrovlarini tuzish uchun yuboradi.

## 91-modda. Byudjet soʻrovlarini koʻrib chiqish tartibi

Byudjet soʻrovlarini koʻrib chiqish:

tumanlar va shaharlar byudjetidan moliyalashtiriladigan byudjet tashkilotlari va byudjet mablagʻlari oluvchilar boʻyicha — tumanlar va shaharlar hokimliklarining moliya boʻlimlari tomonidan;

Qoraqalpogʻiston Respublikasining respublika byudjetidan, viloyatlarning viloyat byudjetlaridan va Toshkent shahrining shahar byudjetidan moliyalashtiriladigan byudjet tashkilotlari va byudjet mablagʻlari oluvchilar boʻyicha, shuningdek tumanlar va shaharlar byudjetlari loyiholari boʻyicha — Qoraqalpogʻiston Respublikasi Moliya vazirligi, viloyatlar va Toshkent shahar hokimliklarining moliya boshqarmalari tomonidan;

Oʻzbekiston Respublikasining respublika byudjetidan moliyalashtiriladigan tasarrufdagi byudjet tashkilotlari va byudjet mablagʻlari oluvchilar boʻyicha — byudjet mablagʻlarini taqsimlovchilar tomonidan.

*(91-moddaning birinchi qismi Oʻzbekiston Respublikasining 2015 yil 29 dekabrda OʻRQ-396-*

*sonli Qonunga asosan to'rtinchi xatboshi bilan to'ldirilgan — O'R QHT, 2015 y., 52-son, 645-modda)*

byudjet mablag'larini taqsimlovchilar, Qoraqalpog'iston Respublikasi byudjeti, viloyatlar va Toshkent shahar mahalliy byudjetlari loyihalari, shuningdek davlat maqsadli jamg'armalari byudjetlari loyihalari bo'yicha — O'zbekiston Respublikasi Moliya vazirligi tomonidan amalga oshiriladi.

O'zbekiston Respublikasi Davlat soliq qo'mitasi, O'zbekiston Respublikasi Davlat bojxona qo'mitasi va boshqa vazirliklar, davlat qo'mitalari hamda idoralarning Davlat byudjeti loyihasining daromad qismi bo'yicha takliflarini ko'rib chiqish O'zbekiston Respublikasi Moliya vazirligi tomonidan amalga oshiriladi.

Byudjet so'rovlari ko'rib chiqilayotganda O'zbekiston Respublikasi Moliya vazirligiga byudjet so'rovlari olinganidan keyin o'n ish kuni ichida quyidagilarga yozma bildirishlar yuborish huquqi beriladi:

byudjet mablag'larini taqsimlovchilarga va davlat maqsadli jamg'armalarini taqsimlovchi organlarga — amalga oshirish uchun asoslar mavjud bo'lmagan, ijtimoiy-iqtisodiy samaradorligi past bo'lgan, byudjet daromadlarining tegishli o'sishi bilan ta'minlanmagan xarajatlarni kamaytirish to'g'risida, shuningdek byudjet tashkilotlari va byudjet mablag'lari oluvchilar faoliyatining samaradorlik ko'rsatkichlari pasaygan hollarda xarajatlarni maqbullashtirish haqida;

Qoraqalpog'iston Respublikasi Vazirlar Kengashi, viloyatlar, Toshkent shahar hokimliklari va davlat maqsadli jamg'armalarini taqsimlovchi organlarga — tegishli byudjetlar va davlat maqsadli jamg'armalari byudjetlari daromadlari hamda xarajatlarining prognozlari asossiz ravishda pasaytirilgan yoki oshirilgan hollarda, mazkur prognozlarga tuzatish kiritish to'g'risida.

Ushbu moddaning **uchinchi qismida** ko'rsatilgan hollarda byudjet mablag'larini taqsimlovchilar, Qoraqalpog'iston Respublikasi Vazirlar Kengashi, viloyatlar, Toshkent shahar



hokimliklari va davlat maqsadli jamg'armalarini taqsimlovchi organlar O'zbekiston Respublikasi Moliya vazirligining yozma bildirishlarini olgandan keyin uch ish kuni ichida mazkur yozma bildirishlarda ko'rsatilgan fikr-mulohazalarni hisobga olgan holda yangilangan byudjet so'rovlarini taqdim etishi shart.

*Qarang: Mazkur Kodeks 3-moddasi birinchi qismining o'ninchi xatboshisi, 85, 90, 92, 190-moddalari.*

92-modda. Byudjet so'rovlarini taqdim etish muddatlari

Kelgusi davr uchun byudjet so'rovlari:

Qoraqalpog'iston Respublikasining respublika byudjetidan, viloyatlarning viloyat byudjetlaridan va Toshkent shahrining shahar byudjetidan, tumanlar va shaharlar byudjetlaridan moliyalashtiriladigan byudjet tashkilotlari va byudjet mablag'lari oluvchilar tomonidan tegishli moliya organlariga, shuningdek O'zbekiston Respublikasining respublika byudjetidan moliyalashtiriladigan tasarrufdagi byudjet tashkilotlari va byudjet mablag'lari oluvchilar tomonidan byudjet mablag'larini taqsimlovchilarga — joriy yilning 1 iyunigacha;

*(92-moddaning birinchi qismi ikkinchi xatboshisi O'zbekiston Respublikasining 2015 yil 29 dekabrda O'RQ-396-sonli Qonuni tahririda — O'R QHT, 2015 y., 52-son, 645-modda)*

byudjet mablag'larini taqsimlovchilar tomonidan O'zbekiston Respublikasi Moliya vazirligiga — joriy yilning 1 iyuligacha;

davlat maqsadli jamg'armalarini taqsimlovchi organlar tomonidan O'zbekiston Respublikasi Moliya vazirligiga — joriy yilning 1 iyuligacha taqdim etiladi.

O'zbekiston Respublikasi Davlat soliq qo'mitasi, O'zbekiston Respublikasi Davlat bojxona qo'mitasi va boshqa vazirliklar, davlat qo'mitalari hamda idoralar Davlat byudjeti va davlat maqsadli jamg'armalari daromadlarining prognozi bo'yicha takliflarni O'zbekiston Respublikasi Moliya vazirligiga

va davlat maqsadli jamg'armalarini taqsimlovchi organlarga — joriy yilning 15 iyunigacha taqdim etadi.

93-modda. Qoraqalpog'iston Respublikasi byudjetining, viloyatlar va Toshkent shahar mahalliy byudjetlarining hamda davlat maqsadli jamg'armalari byudjetlarining loyihalarini tayyorlash muddatlari

Kelgusi moliya yili uchun Qoraqalpog'iston Respublikasi byudjetining, viloyatlar va Toshkent shahar mahalliy byudjetlarining hamda davlat maqsadli jamg'armalari byudjetlarining loyihalari:

tumanlar va shaharlar hokimliklarining moliya bo'limlari tomonidan Qoraqalpog'iston Respublikasi Moliya vazirligiga, viloyatlar va Toshkent shahar hokimliklarining moliya boshqarmalariga Qoraqalpog'iston Respublikasi Vazirlar Kengashi, viloyatlar va Toshkent shahar hokimliklari tomonidan belgilangan muddatlarda, biroq joriy yilning 25 iyunidan kechiktirmay;

Qoraqalpog'iston Respublikasi Moliya vazirligi, viloyatlar va Toshkent shahar hokimliklarining moliya boshqarmalari, davlat maqsadli jamg'armalarini taqsimlovchi organlar tomonidan O'zbekiston Respublikasi Moliya vazirligiga joriy yilning 1 iyulidan kechiktirmay taqdim etiladi.

Davlat maqsadli jamg'armalari byudjetlarining loyihalarini tayyorlash tartibi qonun hujjatlari bilan belgilanadi.

*Qarang: Mazkur kodeksning 35, 52, 94, 95, 99, 142-moddalari, O'zbekiston Respublikasi Prezidentining 07.06.2017 yildagi "Mahalliy davlat hokimiyati organlarining byudjet vakolatlarini kengaytirish va mahalliy byudjet daromadlarini shakllantirishdagi mas'uliyatini oshirish to'g'risida" gi PQ-3042-sonli qarori.*

## 94-modda. Qoraqalpog‘iston Respublikasi byudjetining, viloyatlar va Toshkent shahar mahalliy byudjetlarining loyihalarini ishlab chiqish

Tumanlar va shaharlar byudjetlarining loyihalari tumanlar va shaharlar hokimliklarining moliya bo‘limlari tomonidan:

daromadlar bo‘yicha — Davlat byudjetiga kiritiladigan daromadlar prognoziga doir takliflar hamda davlat soliq inspeksiyalari, hokimliklarning bo‘limlari va davlat boshqaruvi organlarining boshqa tuman hamda shahar bo‘linmalari tomonidan ma‘muriy-hududiy birlik iqtisodiyotini rivojlantirishning makroiqtisodiy ko‘rsatkichlari prognoziga muvofiq taqdim etiladigan boshqa axborot asosida;

xarajatlar bo‘yicha — tumanlar va shaharlar byudjetlaridan moliyalashtiriladigan byudjet tashkilotlari va byudjet mablag‘lari oluvchilarning byudjet so‘rovlari asosida ishlab chiqiladi.

Qoraqalpog‘iston Respublikasi byudjeti, viloyatlar va Toshkent shahar mahalliy byudjetlarining loyihalari Qoraqalpog‘iston Respublikasi Moliya vazirligi, viloyatlar va Toshkent shahar hokimliklarining moliya boshqarmalari tomonidan:

daromadlar bo‘yicha — Davlat byudjetiga kiritiladigan daromadlar prognoziga doir takliflar hamda davlat soliq boshqarmalari va hokimliklarning boshqarmalari, Qoraqalpog‘iston Respublikasi, viloyatlar va Toshkent shahar davlat boshqaruvi organlarining bo‘linmalari tomonidan ma‘muriy-hududiy birlik iqtisodiyotini rivojlantirishning makroiqtisodiy ko‘rsatkichlari prognoziga muvofiq taqdim etiladigan boshqa axborot asosida;

xarajatlar bo‘yicha — Qoraqalpog‘iston Respublikasining respublika byudjetidan, viloyatlarning viloyat byudjetlaridan, Toshkent shahrining shahar byudjetidan moliyalashtiriladigan byudjet tashkilotlari va byudjet mablag‘lari oluvchilarning byudjet so‘rovlari hamda tegishli tumanlar va shaharlar byudjetlarining loyihalari, shuningdek Qoraqalpog‘iston Respublikasining respublika byudjetidan, viloyatlarning viloyat

byudjetlaridan va Toshkent shahrining shahar byudjetidan moliyalashtiriladigan ayrim tadbirlar uchun xarajatlarning prognoz qilinayotgan hajmi asosida ishlab chiqiladi.

Qoraqalpog‘iston Respublikasi byudjeti, viloyatlar va Toshkent shahar mahalliy byudjetlari loyihalarini taqchillik bilan ishlab chiqishga yo‘l qo‘yilmaydi.

*Qarang: Mazkur kodeksning 35, 52, 93, 95, 99, 142-moddalari, O‘zbekiston Respublikasi Prezidentining 07.06.2017 yildagi “Mahalliy davlat hokimiyati organlarining byudjet vakolatlarini kengaytirish va mahalliy byudjet daromadlarini shakllantirishdagi mas’uliyatini oshirish to‘g‘risida” gi PQ-3042-sonli qarori.*

#### 95-modda. Davlat byudjetining va davlat maqsadli jamg‘armalari byudjetlarining loyihasini ishlab chiqish

Davlat byudjetining loyihasini ishlab chiqish O‘zbekiston Respublikasi Moliya vazirligi tomonidan:

makroiqtisodiy ko‘rsatkichlar prognozi;

daromadlarning tashkil topish manbalari bo‘yicha Davlat byudjeti daromadlari prognozi;

byudjet mablag‘larini taqsimlovchilarning byudjet so‘rovlari va O‘zbekiston Respublikasining respublika byudjeti hisobidan ayrim tadbirlar uchun xarajatlar hajmining prognozi;

Qoraqalpog‘iston Respublikasi byudjeti, viloyatlar va Toshkent shahrining mahalliy byudjetlari loyihalari asosida ishlab chiqiladi.

Davlat byudjetining loyihasida xarajatlar daromadlarning prognoz qilinayotgan hajmidan kelib chiqib Davlat byudjeti taqchilligining cheklangan miqdori hisobga olingan, uni qoplash manbalari belgilangan holda nazarda tutiladi.

Davlat byudjetining loyihasi:

ushbu Kodeksning 50 va 69-moddalariga muvofiq Davlat byudjetining daromadlar manbalari bo‘yicha daromadlari va yo‘nalishlar bo‘yicha xarajatlari prognozidan;

Davlat byudjeti taqchilligining eng yuqori miqdori va uni qoplash manbalaridan tarkib topadi.

Davlat maqsadli jamg'armalarini taqsimlovchi organlar tomonidan ishlab chiqilgan davlat maqsadli jamg'armalari byudjetlarining loyihalari tushumlar manbalari bo'yicha daromadlar va yo'nalishlar bo'yicha xarajatlar prognozidan tarkib topadi.

Davlat maqsadli jamg'armalari byudjetlarining loyihalarini taqchillik bilan ishlab chiqishga, agar taqchillik davlat maqsadli jamg'armalarining yil boshidagi qoldiq mablag'lari bilan qoplanmasa, yo'l qo'yilmaydi.

*(95-moddaning beshinchi qismi O'zbekiston Respublikasining 2017 yil 29 dekabrda O'RQ-454-sonli Qonuni tahririda — Qonun hujjatlari ma'lumotlari milliy bazasi, 01.01.2018 y., 03/18/454/0493-son)*

*Qarang: Mazkur kodeksning 35, 52, 93, 94, 99, 142-moddalari, O'zbekiston Respublikasi Prezidentining 07.06.2017 yildagi "Mahalliy davlat hokimiyati organlarining byudjet vakolatlarini kengaytirish va mahalliy byudjet daromadlarini shakllantirishdagi mas'uliyatini oshirish to'g'risida" gi PQ-3042-sonli qarori.*

## 96-modda. Byudjetnoma

Byudjetnoma — erishilgan natijalar hisobga olingan holda mamlakatni kelgusi davrda ijtimoiy-iqtisodiy rivojlantirishning asosiy yo'nalishlarini nazarda tutuvchi hujjat bo'lib, ushbu yo'nalishlar asosida Davlat byudjeti to'g'risidagi qonun loyihasi ishlab chiqiladi.

Byudjetnoma quyidagilarni o'z ichiga oladi:

mamlakatni ijtimoiy-iqtisodiy rivojlantirishning o'tgan yilgi asosiy yakunlarini va mamlakatni ijtimoiy-iqtisodiy rivojlantirishning joriy yilgi yakunlarining prognoz bahosini,



shuningdek mamlakatni ijtimoiy-iqtisodiy rivojlantirishning oʻrta muddatli davr uchun asosiy yoʻnalishlarini;

Davlat byudjetining va davlat maqsadli jamgʻarmalari byudjetlarining loyihasini ishlab chiqishda foydalanilgan asosiy makroiqtisodiy koʻrsatkichlarning oʻrta muddatli davr uchun prognozini;

Davlat byudjeti va davlat maqsadli jamgʻarmalari byudjetlari joriy yildagi ijrosining prognoz bahosini;

fiskal tavakkalchiliklar tahlili hisobga olingan holda oʻrta muddatli davr uchun fiskal strategiyasini;

prognoz yil uchun Davlat byudjetining va davlat maqsadli jamgʻarmalari byudjetlarining loyihasini, Oʻzbekiston Respublikasi Tiklanish va taraqqiyot jamgʻarmasi daromadlari va xarajatlarining hamda kelgusi ikki yilga oid byudjet moʻljallarini;

davlat qarzining holati toʻgʻrisidagi maʼlumotlarni, shuningdek Oʻzbekiston Respublikasi tomonidan yoki uning kafolati ostida jalb qilinadigan kreditlarning yillik chegaraviy miqdorini.

*(96-modda Oʻzbekiston Respublikasining 2019 yil 9 dekabrda OʻRQ-590-sonli Qonuni tahririda — Qonun hujjatlari maʼlumotlari milliy bazasi, 10.12.2019 y., 03/19/590/4129-son)*